



# LAMEPA

LOMIGA  
IANUARI-FEPUARI  
2022

**EKALLESIA FAAPOTOPOTOGA KERISIANO AMERIKA SAMOA**

**MAE'A FONOTAGA A KOMITI TUMAU - IANUARI 2022**

<b>ANOTUSI</b>	
Mae'a Fono a Komiti Tumau—Ianuari 2022	1
Aafia Amerika Samoa i le Koviti	1
Lauga	2
Meaalofa Sosaiete Maketi o Toga mo le EFKAS	3
Amata Galuega Faafou Fale "Taeaoafua o Tupulaga" i Kanana Fou	4
Filifilia Talaimalo M. Uiagalelei AF e fai ma Loia Fautua a le EFKAS	4
Mai le Kolisi Faafaifeau i Kanana Fou: "E tui pe le tui mo le koviti-19?"	5
'Aufaigaluega agavaa mo le Tausi 'Aulotu	9

Ua mae'a manuia fonotaga a Komiti Tumau a le EFKAS sa feagai ai ia Ianuari 18-27, 2022. O fonotaga masani ia a Komiti e pei ona aiaia e le Faavae o le Ekalesia e faia i le masina o Ianuari ma Iulai o tausaga ta'itasi. E masani ona malaga mai ai sui o Komiti mai Matagaluega i fafo i Amerika Samoa e fono ai i le laumua a le Ekalesia i Kanana Fou. Ae talu ai le tapunia pea o alavaa i Amerika Samoa ona o le faama'i o le koviti, ua faatino fonotaga o lenei tausaga i luga o le upega tafailagi, e pei foi ona faia i tausaga ua mavae.

O lenei tausaga sa mafai ona fono uma Komiti Tumau e 6 a le Ekalesia Aoa: o le Komiti a le Au Toeaina, Komiti Faamisionare, Komiti o Feau Eseese, Komiti o Tupe, Komiti o Aoga, ma le Komiti o Atina'e. Na'o....



Komiti e iai mataupu ta'ua e le mafai ona faatali ia Iulai, e masani ona fono ia Ianuari. Peita'i, o le fono ai o Komiti Tumau uma ia Ianuari i lenei tausaga, e faailoa mai ai le tele o mataupu ta'ua e manaomia ona soalaupule ai Komiti ta'itasi au'ā le alualu i luma o galuega a le Ekalesia Aoa.

O le Komiti a le 'Au Toeaina e masani lava ona fono ia Ianuari i tausaga uma talu ai le tele o mataupu tau i le 'au-faigaluega ma le itu faaleagaga o le Ekalesia e tula'i mai pea e mana'omia ona soalaupule ai Tamā o le Ekalesia. O le fono foi lenei na ofi mai ai se totino fou o le Komiti, o le afioga i le Tiakono Toeaina ia Falaula Salanoa, o le Tiakono Toeaina fou o le Matagaluega a Kalefonia i Matu.

O le fono a le Komiti Faamisionare sa faasoa ai le Komiti i nisi o mataupu sa tula'i mai i galuega faamisionare a le Ekalesia, e aafia ai galuega i Spokane, Washington; El Paso, Texas; Clarksville, Tennessee; Virginia, DMV; Lawton, Oklahoma; Antioch, California; ma Hilo, Hawaii sa momoli atu ai le misionare fou ia Sitau Ofoia Jr ma lona faletua. Pule alofa lava le Atua o loo manuia uma galuega faamisionare a le Ekalesia.

O le Komiti o Aoga sa faasoa i le galuega a le Ofisa o Aoaoga Kerisiano, aemaise le taualoaina o le Aoga Mau-luga i Kanana Fou e le vasega o le WASC. O se tala fiafia lea i le Komiti ina ua faailoa mai e le Tamata'i Pule ia Sina-itaaga G. Tufele le asiasiga a le WASC sa faia ia Novema 2021 i luga o le upega tafailagi. O Tesema 2021 sa mau mai ai le tali o le asiasiga, ma ua faailoa mai e le WASC ua aloa'ia le taualoaina o le Aoga Mau-luga o Kanana Fou mo le ono tausaga. Sa momoli le faafetai a le Komiti o Aoga i le Tamaita'i Pule ma le aiga o faiaoga mo lenei tala fiafia.

Sa fono le Komiti o Atina'e e faatulaga lana pepa o le Lucky Number mo Iulai 16, 2022. O le Komiti o Feau Eseese sa faasoa i le faafouina o le fale taalo 'Taeaoafua o Tupulaga'. A o le Komiti o Tupe, sa faasoa i le tala o tupe a le Ekalesia ma le paketi o lenei tausaga, faatasi ai ma le 'aitalafu a le Ekalesia i le UCC Cornerstone ua mae'a ona totogiina. O nisi ia o mataupu sa faasoa i fonotaga a Komiti Tumau ua mavae atu. Sau se taimi i le fonotele a le Ekalesia ia Iulai 2022 ona faafofoga lea o le Ekalesia i le atoaoga o ia mataupu.

## AAFIA AMERIKA SAMOA I LE KOVITI

O le aso 22 o Fepuari 2022 na faalauiloa mai ai e le Malo o Amerika Samoa le faamaonia o le pipisi o le faama'i o le koviti i tua i nuu ma afioaga o le atunuu.

O se tala faapopole loto lea i le atunuu faapea le Ekalesia, talu ai ua atoa le lua tausaga o taumafai pea le Malo e taofiofi i fafo lenei faama'i oti, a ua i'u lava ona to'ai mai ma aafia ai le atunuu. Molimau le Malo, o se tasi o tamaita'i foma'i o le Matagaluega o le Soifua Maloloina sa pesia mai le pasase o le Hawaiian Air sa taunuu mai i le aso 26 o Ianuari, ma ua alu atu i tua ma pesia ai lona aiga atoa.

Mo le taimi nei, ua poloi mai le Malo e tapunia uma le atunuu mo le vaiaso e tasi. Ua tapunia uma ai ofisa o le Malo ma pisinisi. Ua tapu foi le potopoto o tagata i nofoaga faitele, e aafia ai ma malumalu tapuai ma potopotoga faa-ekalesia. Ua aumai foi le faailo mai le Laulau o le fonotele ma le Laulau a Tama o le Ekalesia, e faatonu mai le tapunia o malumalu tapuai, faatasi ai ma le faamalosiaga o tagata lotu e fai lava le lotu a le aiga ia. Ua tapunia uma foi aoga a le Ekalesia, faatasi ai ma le Ofisa Tutotonu.

Tatou tatalo mo le atunuu i lenei taimi le faigofie, mo le nofo puipuia o tagata uma mai lenei faama'i faigata. O le a mulimulita'i foi le Lamepa i lenei tala ma toe avatu ai se isi ripoti mo le Ekalesia i le Lamepa o le masina fou.



# LAUGA



Tusi Faitau:

Feagaiga Tuai - Kenese 12:1-2  
Feagaiga Fou - 2 Korinito 4:14-18

Matua: 2 Korinito 4:18 - *“O loo matou lē manatunatu i mea ua va’aia, a’o mea e lē va’aia. Auā o mea ua vaaia e gata mai ia, a’o mea e lē vaaia, e fa’avavau ia”.*

O mea e va’aia, ma mea e lē va’aia. O mea e gata mai, ma mea e leai se mea e gata mai ai, e faavavau. O le gagana lea o le fa’atuatua. O le gagana ua tatou masani ai. O le gagana e lē fou i lā outou fa’afofoga. Auā o le faatuatua, o le gagana lea tatou te fesootai ai ma le Atua.

Ae to’atele pea le ‘au Kerisiano i nei ona aso, e fiafia e tautala i le gagana lea, ae le o malamalama ai. E to’atele e fiafia e ta’uta’u ma faaleo upu o le gagana lea, ae sese lo latou faauigaina. Ae sala foi le sese ma le lē malamalama, auā a tatou o i le Tusi Paia, e le tasi se uiga o le fa’atuatua o iai. E tele ona uiga. E tele foi ona itu. Ma e tofu lava le itu o le faatuatua ma lavelave, ua fa’a-faigata ai i tagata ona malamalama i lona uiga moni.

Ae ui i le tele o ona itu ma ona uiga ‘eseese, e tasi le itu o le fa’atuatua e fia ‘aumaia tatou te mafaufau fa’atasi ai auā se feau o le talalelei mo le ‘aufaitau. E fa’apea: *“O le fa’atuatua o le va’aiga lea, e manino ai la ta va’ai i le Atua ma lona finagalo, e ala mai i mea e tutupu i le soifuaga.”*

O le fa’atuatua e pei o le va’aiga – le va’aiga foi lea e masani ona fa’aaoga e faitau-tusi ai, poo le matioata foi. Auā a leai se va’aiga, e nenefu ma fa’aletonu le va’ai. Ae a la’ei le va’aiga, malamalama ma manino lelei le vaai.

E fa’apena le itu o le fa’atuatua e fia fa’amamafa i lenei lauga. Auā a leai se va’aiga fa’ale-fa’atuatua tatou te vaaivai ai ma fetuunai ai mea e tutupu mai i le soifuaga, e nenefu le ta va’ai i le Atua ma lona finagalo mo i tatou. A o le fesili, aisea o le a nenefu ai?

Soo se mea lava e tupu i le soifuaga e aafia ai lo tatou ola, e iai le itu e lelei ai, e iai foi le itu e faaletonu ai. E iai lona itu faaletino, ae iai foi ma lona itu faaleagaga. Poo mea e tupu i totonu o tatou aiga, i totonu o nuu, o fale faigaluega, faapea le Ekalesia—soo mea lava e tupu e aafia ai lo tatou ola, e iai lona itu fa’ale-tagata, ae iai foi ma lona itu fa’ale-Atua.

O le masani la o le tagata, o a mea e tutupu mai, e gata lona vaai i le itu faaletino. A tutupu mai ni faapefea, e gata lava le vaai o le tagata i le itu e faaletonu ai. Na te le mafai ona vaaia le itu e lelei ai. E nenefu lona vaai i le itu faaleagaga. E tauaso foi lona silasila i le itu faale-Atua. O le masani lea o le to’atele i nei ona aso.

A o le vaai fa’ale-fa’atuatua, o a mea e tutupu mai, e lē gata mai le va’ai o le tagata i le itu fa’ale-tino, ae taula’i lona silasila i le itu fa’ale-agaga. E lē fa’atuao’ia foi le taga’i i le itu fa’ale-tagata, ae sopoloa ai le silasila i le itu fa’ale-Atua.

O le va’aiga lea sa taumafai le Atua e a’oa’o ai Aperaaamo, i le tusi faitau mai le tusi o Kenese. O le tala i le vala’auina o Aperaaamo. O le vala’auina na folafola ai e le Atua ana faamanuiaga mo Aperaaamo: *“Ou te faia oe ma nu’u tele, ou te matuā fa’amamaluina lou igoa, e manuia foi ia te oe o aiga uma o le lalolagi.”* A’o le folafolaga, na muamua mai ai i luma le fa’atonuga: *“Ia tu’ua e oe lou nu’u, ma tagata o lou nu’u, ma le aiga o lou Tamā, ae alu atu i se nu’u ou te fa’asino atu ai ia te oe”.*

Fai si faigata o le filifiliga lea ua fa’ataoto e le Atua mo Aperaaamo. *“A fia fai oe ma nu’u tele, ia tu’ua lou nu’u.”* *“A fia fa’amamaluina lou igoa, lafoa’i lou aiga.”* O ai se tagata e mafai ona tu’ua lona nu’u sa ola mai ai? O ai se tagata e mafai ona tu’ulafoai lona aiga, sa afuafua ma fa’afaiilele mai ai lona soifua? E le faigofie. A o faiga ia ua masani ai le Atua, i lona valaauina o le tagata e faia lona finagalo. E le tala feagai i le mafaufau faale-tagata. E faigata foi i le tagata ona malamalama atoatoa iai. Ae a vala’au le Atua i le tagata, e tatau lava i le tagata ona talia i le fa’atuatua. O le fa’atuatua lā lea o loo taumafai le Atua e a’oa’o ai Aperaaamo. Ae amata i le fa’atonuga, ia tu’ua lou nuu ma lou aiga. E amata i le taumafaiga, ia vavae ese Aperaaamo mai lona nu’u ma lona aiga. Aisea? Aiseā ua finagalo ai le Atua e vavae ese Aperaaamo mai lona nuu ma lona aiga? Ina ia a’oa’oina Aperaaamo ia fa’atuatua-tasi i le Atua!

‘Aua e te toe fa’amoemoe i lou nu’u. ‘Aua foi e te toe fa’alagolago i ni ou aiga. O le tagata ua valaau e le Atua, na’o le Atua lava e to’atasi, ia fa’amoemoe ma fa’alagolago i ai. O le uiga moni a lea o le fa’atuatua – o le tu’u ese o mea uma sa fa’amoemoe ma fa’alagolago iai le tagata, ae fa’alagolago-tasi ma fa’amoemoe-tasi i le Atua.

O le Atua lea na valaauina Aperaaamo, o le Atua foi, na te fa’ataunuuna le valaau. Ua uma ona tapena e le Atua mea uma; pau le mea a Aperaaamo o le tu i luga ma savali – savali ma le fa’atuatua – savali ma le mautinoa, e faataunuua e le Atua lona valaauina. O a la mea e tutupu mai i lava savaliga ma le Atua, e le toe gata le va’ai a Aperaaamo i le itu fa’aletino o mea e tutupu mai, ae o le a taula’i lona silasila i le itu fa’ale-agaga. E le toe tapula’a foi lona va’ai i le itu fa’ale-tagata o mea e a’afia ai lona soifua, ae o le a sopoloa lona silasila i lona itu fa’ale-Atua.

O le va’aiga foi lea sa naunau ai le Aposetolo mo le ‘au Kerisiano i Korinito, e pei ona atagia i upu ia ua avea ma matua. *“O loo matou lē manatunatu i mea ua va’aia, a o mea e lē vaaia; Auā o mea ua vaaia e gata mai ia, a o mea e lē vaaia, e fa’avavau ia”.*

Tautala Paulo i le eseese o le mea e va’aia, ma mea e lē va’aia. O mea e va’aia, o mea fa’aletagata. O mea fa’aletina, auā o mea e va’aia e mata o le tino. I le manatu o le Aposetolo, o mea ia e fa’atauva. A o mea e lē va’aia, o mea ia fa’aleagaga. O mea fa’ale-Atua. O mea e fa’avavau auā e leai se mea e gata mai ai. O mea ia e lē mafai e mata o le tino ona va’aia. Ae na’o le fa’atuatua – o mata ia o le agaga – e manino ai le silasila i mea ia.

Ua tele a’oa’oga tau fa’asesē ua ofi mai i totonu o le Ekalesia i Korinito, ma fa’aletonu ai le galuega. O a’oa’oga

ua fa'amamua ai le va'ai fa'aletino ma fa'amamafa ai le itu fa'ale-tagata o galuega fa'atino i totonu o le Ekalesia.

O le feau lā a le Aposetolo ia Korinito: ia naunau i mea e lē va'aia! Ia fa'amamua le va'ai fa'ale-agaga! Ia fa'amamua i le silasila fa'ale-Atua! Auā o le va'ai fa'aletino lea o loo outou fa'amamafaina Korinito, e gata mai. E fa'aseseina ai foi outou. A'o le va'ai fa'ale-Atua, e taula'i ai le va'ai i mea e fa'avavau. E toto'a ai foi le silasila i mea fa'aleagaga.

O le Ekalesia lā ua masani i le va'aiga fa'ale-Atua, e fa'ale-Atua foi ana mea e fai. E manuia ana galuega e fa'atino, auā o galuega e fa'amamua ai mea fa'aleagaga. E aanoa foi lana auaunaga i le Atua, auā o le auaunaga e naunau e fa'amalie le finagalo o le Atua, ae lē o mana'oga fa'aletagata. A o le Ekalesia e va'ai fa'aletagata, e fa'aletagata foi le i'uga o ana mea e fai. E lē i'u i se lelei ana galuega fa'atino. E fa'afoliga foi lana auaunaga i le Atua. Auā e fiafia e ta'uta'u le suafa o le Atua i ana mea e fai, ae nanā ai i tua le fa'amalieina o tu'inauga fa'ale-tagata.

O le naunautaga lā a le Aposetolo mo le Ekalesia i Korinito: ia toto'a le va'ai fa'ale-Atua i mea e tutupu mai le galuega. Ia manino le silasila fa'aleagaga i mea e a'afia ai le soifua fa'a-Kerisiano. Auā e le o mea e va'aia, a'o mea e lē va'aia. E le o mea fa'aletagata, a'o mea fa'ale-Atua.

Ekalesia ma le fanau o le Atua, malo le onosai. Malo le galulue. Malo le taupati i le feau ma le galuega a le Atua. Ua tuana'i atu le 2021. E le fesiligia le tele o mea sa tutupu sa aafia ai lo tatou ola i lona tausaga. Fa'i o mea e tutupu i totonu o tatou aiga, a o totonu o nuu, o le faigamalo ma fale faigaluega, faapea ai ma le Ekalesia. O faiga lava ia o le soifuaga. E tele fita ma faigata. Ua na'o mea e vave ai ona solomuli le soifua ofoina atu mo le Atua.

A o le feau o le talalelei mo i tatou i lenei foi tausaga 2022 o le a tatou savalia, o a mea e tutupu mai e aafia ai lo tatou ola, 'aua ne'i fa'ale-tino ai lau va'ai. 'Aua foi ne'i fa'aletagata ai lou silasila. Ae ia va'ava'ai ma le fa'atuatua. Ia va'aivaai i le itu faaleagaga. Ia silasila mo le loto ua talitonu, o le Atua na valaauina i ta'ua, o le Atua foi na te toe fa'ataunuina. Auā o le tagata e galue mo le Atua ae fa'ale-tagata lona va'ai i mea e tutupu mai ma aafia ai lona soifua, o le tagata foi lona e vave ona solomuli ma fa'avaivaia ai lona ola galue. A o le tagata e galue ae fa'ale-Atua lona silasila i mea e tutupu mai, poo a fita ma faigata e fesou'ina ai, e le solomuli; e le faavaivai foi. Aisea? Auā e galue, ae ua fa'atuatua ma le mautinoa, e le tuulafoaiina e le Atua ona tagata. E galue ma le loto talitonu, e aumaia lava e le Atua le tui o a tatou galuega e fai.

E iai taimi e puao ai ma nenefu ai le vaai i le vaai fa'aitau tusi, ona manaomia lea o se 'ie'ie e solo ai, ona toe lelei lea o le vaai. A leai foi, ua toe faatau se isi vaai fou e sili atu lona malosi, ina ia lelei ai le silasila. E faapena le vaai faale-faatuatua. E iai taimi e nenefu ai. O taimi ua malosi ai, ma taimi ua solomuli ai. O taimi ua maua ai, ma taimi ua faaletonu ai. Ae faafetai i le Atua, o loo liligi mai pea ana faamanuiga mo i tatou, e faatuputele, ma faama'ati ai le ta vaai faale-faatuatua i le soifuaga ma mea e tutupu mai. E le o mea e vaai, a o mea e lē vaai...AMENE!

## MEALLOFA A LE SOSAIETE MAKETI O TOGA MO LE EFKAS



O le aso 11 o Fepuari, 2022, sa auina mai ai le meaalofa a le "Sosaiete Maketi o Toga" e faafetaia ai le agalelei o le EFKAS mo le meaalofa tupe sa auina atu mo le atumotu o Toga, ona o le maugamu ma le galu lolo sa afatia ai ona tagata i le aso 13 o Ianuari, 2022. O lenei meaalofa sa saunia e le Sosaiete Maketi o Toga, o le taumafataga mai Toga, e aofia ai figota o le sami, o manu mai le lafu, faapea taumafa e tele e masani ai tagata Toga. O le Tinā ia Dr. Claire T. Poumele, Ta'ita'ifono o le Sosaiete Maketi o Toga, sa ta'ita'iina le auina mai o le meaalofa, faatasi ai ma totino o le sosaiete.

O le feiloaiga ma le Sosaiete Maketi o Toga sa faia i le Ofisa Tutotonu i Kanana Fou. O le Susuga i le Taitaifono ia Faateete Saifoloi FT ma le faletua, le Susuga i le Sui Taitaifono ia Dr. Leatulagi Faalevao FT ma le faletua, le Teutupe a le Ekalesia ia Poialii Fiasili P. Haleck, ma le Failautusi Aoa o Nafatali Falealii FS, sa fai ma sui o le EFKAS e taliaina le meaalofa. O se feiloaiga fiafia ma le Matagofie, aemaise le molimauina o tu ma aga o Toga sa faatino i le aso. Ae le gata i lea, le anoanoa'i o mea taumafa e le mafaitaulia, lea ua faaaloalo mai ai i le Ekalesia.

Sa saunoa faafeiloai le Failautusi Aoa e faafetaia le aga-lelei o le Atua ua mafai ona feiloai fiafia le Sosaiete Maketi o Toga ma le Laulaufono. O le Susuga i le Sui Taitaifono sa saunoa i le Afioga a le Atua ma saunia le tatalo. A o le Susuga i le Taitaifono sa saunoa faafetai i le sosaiete mo lenei faaaloalo tele. Saunia foi e le Tetupe le pasese mo le sosaiete ina ua uulima ma faatofa.

E malie foi i le faalogo le saunoaga a Dr. Claire Poumele i le faia o le EFKAS ma le Sosaiete Maketi o Toga, ina ua faailoa mai, o ona tuaā sa fausia le malumalu 'Ua Taunuu' i le 1985. Malo Lelei! Malo Aupito! Faafetai le faaaloalo!



## AMATA LE GALUEGA FAAFOU FALE 'TAEAOAFUA O TUPULAGA'



O le masina o Tesema 2021 na amatalia ai le galuega e toe faafou ai le Fale Taalo "Taeaoafua o Tupulaga" i le laumua o le Ekalesia i Kanana Fou. O lenei galuega sa mafai ona faatino ona o le galulue faatasi o le Laulau o le Komiti o Aoga ma le Laulau o le Komiti o Feau Eseese i se talosaga sa tuuina atu i le Malo o Amerika Samoa mo le alaga tupe mai le Malo Tele o Amerika, e fesoasoani ai i le faaleleia o le Aoga Mauuluga i Kanana Fou, aemaise le saunia o le Aoga Mauuluga mo le faia o vasega a le fanau i luga o le upega tafailagi i le taimi o le koviti. O le aofa'i o le seleni sa mafai ona maua mai i le talosaga sa tuuina atu e faatino ai le galuega, e \$1.2 miliona tala.

O lenei galuega sa amata ona fuafua ma tapena ina ua mae'a le fonotele a le Ekalesia ia Iulai 2021. O le Susuga ia Iasepi Ulu FS, Failautusi o le Komiti o Feau Eseese, ma le Susuga ia Eleasaro Faataa FS, Taitai o le Komiti o Aoga, sa galulue faatasi ma le Tamaita'i Pule o le Aoga Mauuluga i Kanana Fou, Sinaitaaga G. Tufele, i le tuu faatasia o le talosaga sa mafai ona maua mai ai le alaga tupe e faatino ai lenei galuega.

E lei faigofie le taumafaiga o lenei talosaga ona o le tele o feuia'iga. E le gata i aiaiga a le Ofisa o Aoga o le Malo o Amerika Samoa e patino mo alaga tupe mai fafo, a o aiaiga foi sa tuuina mai e le Ofisa o Galuega Lautele, ae faapea le Ofisa o Fefaataua'iga ma le Ofisa o Mea Totino a le Malo. Ona o le tele o aiaiga ma fauia'iga, na oo lava le savali ma le faa-talsoaga i luga o le Ofisa o le Kovana e faapupula mai le 'auala sa'o e tataua ona ui ai le talosaga. E ui i le tele o feuia'iga, peita'i, sa agalelei mai le Atua i lenei taumafaiga, ma o le masina o Novema 2021 na oo mai le faaliga ua talia alo'ia le talosaga, ma ua mafai ona amata le galuega.



O le konekarate/kamupani a Nana's sa filifilia ma tofia e faafoeina lenei galuega faafou. O galuega e faatino mo le faafouina o le fale taalo a tupulaga, e aofia ai: toe ato ato le fale taalo ma faalautele puipui i autafa e tali ai le tafe mai o le vai pe a savili, e 4 ofisa fou ma potu fono tetele 2 e faaopoopo i totonu o le fale taalo, e faafou uma falele'eta'ua ma vai taele ma le nofoaga e sui ai lavalava, ma faasima ato le 'auala e taamilo ai le fale taalo.

Ua iai le faamoemoe e mae'a le galuega i le masina o Iuni 2022, ina ia talafeagai mo le fonotele ia Iulai 2022. E fuafua lea i le avanoa mai o oloa (materials) e faatino ai le galuega, ona ua sioki le tele o oloa i faleoloa.

\*\*\*\*\*

## FILIFILIA TALAIMALO MARCELLUS UIAGALELEI (AF) E FAI MA LOIA FAUTUA A LE EFKAS

Ua filifilia le Susuga i le A'oa'o Fesoasoani ia Talaimalo Marcellus Uiagalelei e fai ma Loia Fautua a le EFKAS. O lenei tofiga sa faia ina ua faamavae le Loia Fautua sa iai i le fonotele 2021, le Afioga i le Tiakono ia Talauega Eleasalo Ale. I lona tusi faamavae sa auina mai i luma o le fonotele, na faailoa mai ai e Talauega le faamaloloina o lana laisene faaloia e tusa ai ma ala o Tulafono o Amerika Samoa, talu ai lona tofiga fou o le Lutena Kovana o le Malo o Amerika Samoa. Na talia e le fonotele ma le loto ootia le faamavae o le auuana. Sa momoli foi le faafetai a le Taitaifono ia Faaeteete Saifoiloi FT ia Talauega ona o le tele o ana galuega lelei sa faia mo le Ekalesia i lona tofi o le Loia Fautua, faatasi ai ma faamanuiaga i lona tofi Lutena Kovana o Amerika Samoa o loo galue ai nei mo le tautuaina o le atunuu.

E tusa ai ma aiaiga o le Faavae o le Ekalesia, o le Laulau-fono o le Fonotele a le Ekalesia e filifilia le Loia Fautua a le Ekalesia, ona aumai lea i luma o le fonotele e faamaonia ai. E le i faigofie i le laulaufono le sailiga o se tasi mo le tofi Loia Fautua, talu ai e to'atele tama fanau a le Ekalesia e agavaa mo lea tofi. Peita'i, sa 'au tasi le Laulaufono i le Susuga ia Talaimalo Marcellus Uiagalelei, o se tasi foi alii loia ua leva ona tautua i le Ofisa o Faamasanigo ma le Malo o Amerika Samoa.

O Talaimalo e sau mai le afioaga o Futiga, Amerika Samoa, ma o se totino foi o le EFKAS i Futiga. Ua leva ona galulue i la'ua ma si ona faletua i le tofi Tiakono i le EFKAS Futiga. O le masina o Oketopa 2021 na te'a nei, na su'e ai Talaimalo i le su'ega A'oa'o Fesoasoani, ma o le fono a le Komiti o le 'Au Toeaina ia Ianuari 2022, na faamaonia ai le pasia o lana su'ega mo le tofi A'oa'o Fesoasoani.

O le masina foi o Ianuari 2022, na tusi aloa'ia mai ai le Susuga i le A'oa'o ia Talaimalo ua na talia le tofiga a le Laulaufono e avea o ia ma Loia Fautua a le Ekalesia. Ia faamanuia tele le Atua i lau Susuga i le A'oa'o e tofiga fou e pei ona valaauina ai e le Atua.



## KOLISI FAFAIFEAU I KANANA FOU

### “E TUI PE LE TUI MO LE KOVITI-19?”

*Saunia: Rev. Dr. Moreli Niuaatoa, Peresetene KFTS*

Samoa e tautala ma le faaeteete i le maupu'epu'e ma le tifato o ou mauga mauululuga ma ou vanu āsaasagatā. Le loloto o ou vasa alogatā e fia e gase ai le tautai auā e au tatāfe ma souā. E lē tautala ma'ale'ale pe faafitifti i ai se taofi auā ua tupu le tai ma le vai i ou paia lē aveā. Nuunuu atu. Na ou faitau lea, o loo taoto iina le uta a le faimea. A e alo maia sei o tatou sasaa le 'ato ponapona ma tauilova'ili se 'ai lelei ia maua se 'aulape tāua ma se atamai fautua e tali ai le fesili ua faaulutala ai lenei tusiga—E tui pe le tui mo le Koviti-19?

Ua lē toe pō malaē i asuasua na faali'ali'a o le pepesi o le siana i tagatanuu o le atunuu i aso ua tuana'i atu. E logo a ma le alofa i le faaoloma'au a le afioga i le alii Kovana, Hon. Lemanu Peleti P. Mauga, i le atunuu ona o i latou e lē o faia tui puipuia o le Koviti-19. Ua malele lana afioga ma tālo atu ia i latou uma ia alofagia fai outou tui puipuia. Aua nei faapito manū ia tasi ma manatu ifo le tagata na o ia lava ae silasila ma le alofa i le lautele e tūgā aafia pe a e faatamala ma lē faia ou tui puipuia o le Koviti. O upu faamanatu a le Alii—“Ia e alofa atu i le lua te tuā'oi ia pei o oe lava ia te oe” (Mat. 22:39; Mareko 12:31); alofa puipui lou tuā'oi nei pesia ma lavea'i oe nei aafia. O upu ia o le malamalama faasuaa o le Alii; o upu e faatotōgo ola ma faatupu filemu ia tauata'i ma toe fuata'i le tōfā; ia utauta lelei ma vaai mamao. Faaeteete nei o tatou faia se faai'uga sesē pe tāmāu i se talitonuga faalelotu ae talavā ai le nonofo faatasi pe taugā ai foi le soifua mālōlōina o le atunuu.

#### A. Koviti-19 ma Aafiaga o le Atunuu:

Ua siitia le tulaga puipuia o le atunuu mai le LANU SAMASAMA (*Code Yellow*) i le LANU MŪMŪ (*Code Red*). E lē se tala fatu le mau ua pepesi i tua i nuu ma tagatanuu le siana o le faama'i ona ua faatamala le tagata. E leai se naunau ia tatou eseese, auā e tasi lea o le manunu o le to'au o le taofi eseese i le fai ma le lē faia ole tui puipuia. O le faanaunauga ia maopoopo o tatou loto e lavea'iina le atunuu ma ona tagatanuu; a tatou maopoopo, o le utugā'oa tōfā saili lena e faalagolago i ai le soifua saogalemu o le atunuu. O le tatalo ma le mana'o lena o le tatou faigāmālō ua lagolagosua i ai ekalesia, o mai tatou te faausu le atu o le taeao e fai se tatou 'ai mo le tagi mai a le atunuu, aemaise o le faigāmālō o taufonō pea ma tu'itu'ipapāle i faitoto'a o outou loto ia galulue faatasi. Na ou faapea lea, o le a tuutuu lata mai ia se taofi nei lē lava se taimi mo se faasoa auā le tatou mataupu faigata ua filifilia mo lenei tusiga.

O Samoa o le atunuu faatuatua i le ATUA; le talitonuga tautasia lena a o tatou matua. O le faatuatua tatou te fesoota'i

ma iloa ai pe se a le finagalo o le ATUA mo oe ma a'u. O le mausa lena o le tatou tausinioga i le olaga lenei, ia tatou iloa le finagalo o le ATUA ma tatou usita'i i ai. Ua fofola manino mai e Paulo le agaga tāua lena: “Aua foi tatou te amio faatasi ma lenei lalolagi, a e peitai ia liliuina i le toe futaiina o outou loto, ina ia outou suesue pe se a le finagalo o le ATUA, o mea ua lelei, ma le mālie, ma le atoatoa” (Roma 12:2). O oe (ma a'u) e “su'esu'e pe se a le finagalo o le ATUA.” E finagalo le ATUA i “mea ua lelei” ma le “mālie” ma “atoatoa.” O ifea e te maua ai mea ia; te maua i le Tusi Paia, o le faaaliga a le ATUA na tuugutu ma tusitusia e le 'au paia anamua ua aulia mai e tatou. Lona uiga, e te lē tau fesili i se isi tagata poo le a se fe'au a le ATUA mo oe; e fesili lava oe i le ATUA. Tatalo i le ATUA, ona ia faali mai lea o lona finagalo ia te oe. Afai o oe o le tagata faatuatua moni i le ATUA, e lē ta'ita'ina oe e se talitonuga poo ou lagona nei e momoo i liuga a matagi e agi atu ma foi mai ae le iloa poo ifea e mautu i ai. E ta'ita'i oe e le Agaga o le ATUA i le mea sa'o ma faalogo i ai—e lelei, e mālie ma atoatoa. Ona e fesili lea—o le a tonu lava le mea sa'o? O le “ola” ua aumai e le ATUA mo oe ma a'u; e le se talitonuga lotu poo se tapu 'ele'ele. E tasi lava le ola, e lē lua; a e misia le ATUA ua e misia le ola. O le agaga moni, aua nei ta'ita'ina sesē oe e se talitonuga po o ni lagona faalētagata pe faalelotu foi. E ta'ita'i tatou uma ua faatuatua i le ATUA e lona Agaga Paia. Afai e ta'ita'i tatou e o tatou lava lagona faaletagata, mapo lotu poo tapu 'ele'ele, ua ta'ita'ina tatou e le mea sesē. Pe a tatou faalogo ma usita'i i le mea sesē, ua tatou sē ma faalogo sesē. Manatua foi a'oa'oga a Iesu—“afai foi e ta'ita'iina le tauaso e le tauaso, ona la pauu uma ai lea i le lua” (Mataio 15:14). Ua faatatau upu ia a le Alii i le 'au faresaio—tagata mapo lotu ma faifeau o le lotu Iutaia. Ua latou ta'ita'i sesē tagata ia latou mau ma talitonuga mapo lotu fai mai e faavae i le tulafono. Pe afai foi la e faavae i le tulafono, o le ta'ita'itama le tulafono e molimau ia Keriso ua faaaliga mai ai le amiotonu a le ATUA (Roma 3:21). O le faaletonu lea ua tupu, e mumūsu isi e tui ona o le talitonuga e faavae i le mau a le lotu, ae tatau ona faavae ia Keriso e amiotonu ai le mau. Na fai mai lea o Paulo, o lena e “atoatoa ai le amiotonu i la le tulafono ia i tatou” (Roma 8:4). O Keriso o le mau amiotonu e lilifā i ai le malosī o le tulafono. Fai lau faai'uga e ala i lou faatuatua ia Keriso, e lē o lou talitonu ma tāmāu i le tulafono e mapo lotu.

#### E. O le Fofō ma le Faamālōlōga:

Ina ia manino 'au o fala i le tagata soifua, e eseese mea ia e lua—o le “fofō” (treatment) ma le “faamālōlōga” (healing). E toatele ua manatu o le mea lava e tasi; leai, a e eseese. Pe afai ae manua'ā lou lima i se meama'ai (naifi) e tatau ona ave e fai se fofō—treatment; a tūgā lou ulu e faapena foi, ma ma'i uma lava e oo foi i gasegase o le loto e saili fofō. E lē mālōlō le ma'i pe a lē faia se togafiti pe fai se tui ma aumai ni fuālaau e fautua mai ai le foma'i. Pe afai foi o se gasegase tūgā ona auga e tatau ona aumai se foma'i e fai se togafiti ina ia toe maua le malosī o le ma'i. E tatau ona fofō

nei ui le ma'i. Pe fofō Samoa, faatosaga, taulāsea poo le a lava e tatau ona fofō ia malosi; e togafiti le ma'i. O le tala faamaoni. Na aafia se fanau i le ma'i o le niuonia (pneumonia) ae sa mumūsu le ulugalii e ave i le falema'i. Ua atoa le vaiaso o taoto le fanau toalua lea i o la moega ma tatalo ai le ulugalii. Na i'uvale talosaga a le ulugalii, ua maliliu le fanau. O le fesili, ua maliliu le fanau ona o le tatalo? Leai. Na maliliu ona o le faatamala o le ulugalii, sa tatau ona ave le fanau i le falema'i e togafiti; lale e oi mai i tīgā ogaoga o le ma'i. O le faatuatua e te faia ai le mea sa'ō ma talafeagai. O le mea sa'ō ma talafeagai o le ave i le falema'i e vaai le foma'i mo se fautuaga ma se fofō ma tatalo mo le faamālōlōga ia lē aunoa mo le fanau.

E le i atoa se tausaga o lo'u afafine matua ae maua i gasegase o taliga; ua faaletonu lona taliga ma ua ia lē lagona se leo. Na ave i le falema'i e talavai ma vaai le foma'i; aumai ana fuālaau ma fautuaga mai le foma'i e mana'omia ona taoto le afafine ina ia faasaoina lana faalogo. Na usita'i lava e faaauu talavai; ma te le i mapu i le tatalo i le ATUA mo lana faamālōlōga. Na faate'ia ma'ua ua lagona mai e le teine tala o fai atu. Na ave i lana talavai e sosoo ai ma fai ana isi su'ega, aumai le tala fiafia ua mamā lelei le ma'i sa i lona taliga na afāina ai lana faalogo. O le molimau a le alii foma'i, e lē iloa pe na faapefea ona alu ese le ma'i. O le ma'ua faitau faatuatua o le vāvega faamālōlōga a le ATUA. E lua vaega o lona malosi ua toe maua, o le fofō (togafitiga ma fuālaau) ma le faamālōlōga (talosaga i le ATUA). Lona uiga, tusa lava pe te talitonu i lou mapo lotu e lē tatau ona tui oe, faalogo ma usita'i i le Agaga na te faamāfanafanaina tagata lotu. Pe afai e le i faia sou tui puipua, faalogo i le Agaga, tāla ou 'aao e fai lou tui o le Koviti, ma tatalo i le ATUA ia maua pea lou malosi, lau fanau ma lou aiga.

Faamālōlōga, o le mea e patino i le ATUA; na te aumai le mālōlōga i le tino o le tagata ma'i. Fai mai la'u isi faiaoga o le mataupu silisili, aua e te tago i le si'usi'u o le leona lena e moe nei ala oso mai ia te oe. E lē galo ia te a'u upu o le tali a Iesu na ia faasa'o ai le faafiapopoto o le au faresaio ma le au Herotiano na o ane e lamalama i ana upu, pe sa ea ona lafō sana lafoga ia Kaisara pe leai. Ona tali lea o Iesu e faapea—"Ina avatu ia o mea a Kaisara ia Kaisara; ia avatu foi mea a le ATUA i le ATUA" (Mareko 12:17). I se isi faaupuga, e ese mea a le ATUA, ese mea e patino i le tagata; aua nei tā'aia faafala mea e tatau i le ATUA ma mea e ave i le tagata. Lona uiga, e ese le fofō, ese le faamālōlōga; aua le paluina faasapasui. Pe a e fesili, e faapefea ona ou maua le faamālōlōga a le ATUA? E te maua i lou lotu ua faatuatua i le ATUA ae lē o ni talitonuga mapo lotu, tapu 'ele'ele poo ni lagona faaletagata. E toe faafouina e le ATUA lou malosi ma lou mafaufau na pologa ma atuavale ona o le ma'i. Faamālōlōga, e lē se gaoioiga e fai a le tagata, a o le ATUA. O ai na mālōlō ai ma'i lepela, supa, tutuli, tauaso, pipili, ma'i temoni, gūgū, ma isi lava ma'i? O Iesu na mālōlō ai. Na tofū foi le ma'i ma lona fofō na fai i ai. Na feanu Iesu i le palapala ma nini ai mata o le tauaso na pupula; na tuu ona 'aao i taliga o le tutuli na faalogo ai; na ia pa'i i le lima o le tinā o le avā a Peteru ma mālōlō ai; na ia faamālōlō tagata e

toatele na ulutinoina e temoni, le fafine na iai le puna toto i tausaga e 12 na toe malosi ina ua pa'i i le 'ofu o Iesu, ma le tele o ma'i. Na muamua ona fofō e Iesu ma'i uma ia ona mālōlō ai lea o latou uma. O le lesona tāua ua tatou maua, e ese le fofō poo togafitiga o le ma'i, ese le faamālōlōga o le galuega a le Agaga o le ATUA. O fea la lea e tū ai le tagata ua talitonu o le mea lava e tasi; na te mafaia ona faatino mea ia e lua i le taimi e tasi. Leai, ua na o Iesu, le Alo o le ATUA na te mafai. E taumafai loa le tagata e 'apa'apa i mea e patino i le ATUA ona faaletonu lea, ua fia ATUA. E iai le tautua fia matai; e lē se tautua lelei auā e tautua ae faasi'usi'umata i se mea e mana'ō i ai mai le matai; pe a lē o se suafa, fanua, afafine poo le āvā a le matai, solofanua, seevae, poo se isi mea. Ua atili lē mālōlō ai lava le lotu i le ma'i. Fautuaga, tuu ai pea le faamālōlōga a le ATUA e pule aoao le ATUA, ae alu oe e saili se fofō o lou gasegase ma tatalo i le ATUA i lana faamālōlōga. O le fofō e te mālōlō ai mai le Koviti, o le tui. O le tui le fofō a oe, a o lou lavea'iina mai le oti o le faamālōlōga.

Tatou taunuu mai lea i le mataupu o loo vāvā ai nei le atunuu – o tui puipua (vaccination). Na e fesili foi lea, o le a le "tui puipua"? O le tali, o le "fofō" (treatment) lena o le Koviti-19. E puipui mai ai oe i tīgā ogaoga o le ma'i, ma puipua ai isi tagata ne'i pesia atu ia te oe, ma faaititia ai le fuainumera o tagata e 'apo e le vairusi, atoa ai ma tagata maliliu. Ua silia ma le 5 miliona (5, 899,578)<sup>1</sup> tagata maliliu i le lalolagi talu mai ona aafia i le Koviti-19, tausaga 2020. O le tatou tatalo mo latou ua aafia ae ua mae'a ona fai o latou tui puipua ia maua le faamālōlōga a le ATUA. E faapefea la oe lea e musu pe lē talitonu i le tui puipua? Pe afai e te musu e tui, ua e musu i le ola; afai foi e te lē talitonu i le tui, ua e lē talitonu i le musumusuga a le Agaga ma le a'oa'o mai a le Tusi Paia i le mea amiotonu e tatau ona fai. Se, alolofa ia outou o mumūsu e fai tui puipua, aua le palua faasapasui le "faatuatua" ma le "faatuāupua," o mea laia e eseese. Faatuāupua, o lena e te iloa le mea e tatau ona fai ae te lē o faia; fai mai le a'oa'oga a le aposetolo o Iakopo, "O le ua iloa e fai le mea lelei, a e lē faia, o le agasala lea ia te ia" (Iakopo 4:17). E te agasala auā e te faatuatua ae te faatuāupua. O upu a le isi toeaina, aua le tuu faatasia atigifagu nei ta'e; tuu eseese e faasaoina ai. Alu ia e fai lou tui e faasaoina ai oe mai puapuaga o le Koviti-19.

### **I. Tusi Paia ma le Talafaasolopito i le Tāua ma le Aogā o le Tui:**

Ua na o nai mau mai le Tusi Paia e faalatele ma faamaino atili ai le tatou mataupu, pe se finagalo o le ATUA ia faia o tatou tui puipua ia lavea'iina mai ai i le Koviti-19. O se tasi la o mau e amata mai ia Kenese i le faia e le ATUA o le lagi ma le lalolagi. Na faia tatou uma e le ATUA i lona

<sup>1</sup> World Health Organization (WHO): Confirmed Cases: 426,624,850; Confirmed Deaths: 5,899,578; and Vaccine Doses Administered: 10,407,359,583. Last update: February 23, 2022, 05:42 am GMT-11.

faatusa ina ia mafai e tatou ona iloa le mea moni e uiga i le lalolagi ma le mea moni e uiga ia i tatou lava. O tala ma ta'utinoga faaletagata e tāua/aoga ma talitonuina pe afai e toatele ni molimau (Teuteronome 1:16-; 2 Korinito 13:1), o le molimau pepelo e matuā inosia lava (Faataoto 6:16-19), o le tautala faamaoni, ua faaali mai e ia le tonu (Faataoto 12:17), ma “E lavea'iina tagata e le molimau faamaoni” (Faataoto 14:25). Lona uiga, e tāua le tautala ma le faamaoni e lavea'iina ai, e aloa'ia ma talitonuina ai, e sa'oloto ma fiafia ai le loto ma le mafaufau. O le tautala pepelo ma le faa'ole'ole ua e faapologaina e oe lou lava loto i tīgā ma le lē mautinoa. Aua le faapologaina fua lou loto i talitonuga le mautinoa, tuu tasi le faiva o Pili i lou faatuatua e galue mai i ai le Agaga o le ATUA e te tautala faamaoni ai ma e faia se faai'uga amiotonu. Sema sou taimi avanoa e te alu ai e fai lou tui puipua.

Ua tatou iloa foi e faigofie ona liliu le loto o le tagata vaivai ona e le i lava lona silafia; e lē telē foi sana su'e su'ega i le loloto. Peitai o lē ua mafaufau, ua faautauta o ia i lona ala” (Faataoto 14:15). E iai a tatou matāfaioi, ia su'esu'e i le mea moni ma faamaoni e tatau ona ta'ita'iina tatou ia tusa ai ma mea ua tatou talitonu ai (Faataoto 26:22-25). O le mauaina o metotia faamoemoeina e faamaonia ai le atamai faa-saienisi o foma'i ma fuālaau talafeagai mo gasegase—tino, mafaufau, loto—o se laasaga amata lea i le faataunuina o lea faamoemoe. O nisi o gasologa mo le sailia o ia mea moni na amata i le iloilo lelei o tulaga o le ola mālōlōina ma togafitiga e mālōlō ai i le vaitaimi o Hippocrates, 5 TLM. O le talitonuina atili o faiga ma togafitiga faa-saienitisi a foma'i (medical treatment) na faamaonia e le tusitala Iutaia o Ben Sira i lona faaeaea ma le talitonuina o le alii foma'i o Sirach i le 2 TLM. Talitonu o le mafuaaga foi lea na maua ai le vaai a le aposetolo o Paulo i le alii foma'i o Luka i ana tusitusiga—“o Luka le foma'i pele” (Kolose 4:14); “o lē na galulue faatasi ma a'u” (Filemoni 1:24). O le naunau o Luka i mea tau fuālaau mo le tino (medicine) le mafuaaga na tu mati'e ai galuega faamālōlō a Iesu i lana talalelei. O le amana'ia ma le faamoemoeina o faiga faa-foma'i ma a latou saienisi o su'esu'ega e tali ai fesili faigata o le ola, e pei o le fesili lenei—E tatau i le tagata Kerisiano faatuatua ona faia ona tui puipua o le Koviti-19?

E moni, o fuālaau ma togafitiga saienitisi faa-foma'i o le tuana'i na faato'a lelei ma mautu ina ua tofoga a'e le saienisi o le soifua mālōlōina faaonaponei, ina ua maua meafaigaluega e pei o le fā'ata vaaimamao (microscope) na fausia mo su'esu'ega i nisi o atomi (atoms) foafoa ma le faataatiaga o le lalolagi, atoa ai ma nisi o faiga faasaienisi ua alualu lelei. O nei meafaigaluega ma faiga fou ua latou faalateleina le atamai ma agavaa o foma'i saienitisi e malamalama ai le lalolagi ma lona natura ma iloa ai mea moni e uiga i le foafoaga. O le taofiga i le “siamā” (germ theory), na āfua mai le faama'ite mea o le ATUA e faatatau i le pa'ū o le tino ua aafia i ma'i ma mea faapa'upa'u (molds) o ta'ua i le tusi a Levitiko. O le atamai lea o tusitala o le Tusi Paia na mulimulita'i ma faalateleina e nisi o tausi soifua mālōlōina i Initia anamua (6 TLM), mai le TLM 5-15 na faaauau e foma'i ...

Musalemi, na faaogaina e foma'i Europa e ala i le galuega a Louis Pasteur (1860). O le taliaina lautele o nei faiga ma su'esu'ega na faato'ā maopoopo i le tausaga 1890; na aveai loa ma ta'iala mautu e faavae ai su'esu'ega ma faai'uga a le saienisi ma foma'i o le soifua mālōlōina. O su'esu'ega na faia mo virusi (viruses) na amata tonu foi i lona vaiseuga, o isi su'esu'ega i siama (bacteria) na faalatele ma maua ai le tele o siama-ninii ua mafua ai ma'i.

O le vaitaimi lava lea, o ta'iala, o faiga ma faatonuga fou, e pei o Robert Koch ma ana su'esu'ega na iloa mai ai o gasegase poo ma'i e mafua mai i siama-ninii, na amata iloilo ai finauga ma mau faa-foma'i (medical claims) poo a ni faiga e faafaileleina le soifua mālōlōina ma fo'ia ai faama'i. E toatele latou i aso nei ua manatu o faiga faa-saienisi i totonu o fale-talavai i itumālō (clinics) o se ta'iala faaauuro lea mo le faamautuina lelei o se fofō talafeagai e fo'ia ma mālōlō ai gasegase faapitoa. O le faatagaina faatulafono e le Food and Drug Administration (FDA) o le tui o le Pfizer-BioNech mo le Koviti-19 mo tagata e 16 tausaga e aga'i atu i luga na āfua mai i faiga ma gaoioiga faa-saienisi a foma'i i totonu o falema'i faa-itumālō, ma isi o su'esu'ega faaauau e mataitūina le saogalemu o le tui ma le atoatoa o le fausiaina o le tui o le Pfizer.

Talu ai ona o tui (vaccines) ua talitonuina lona aoga ma saogalemu mai tausaga e tele ua mavae, e leai la se mafuaaga e faapea ai le tagata e agasala pe a fai le tui; pe suia ai foi uiga po o le olaga o le tagata e pei ona finauina sesē e nisi o tetee ai. O se faata'ita'iga, na manino lelei, a o le i taitai ona oo mai le virusi na āfua ai le smallpox (o faapa'upa'u mata ninii e sosolo i le tino [rash]), o le tui na fesoasoani e fo'ia ai i le smallpox na aoga ma faaititia ai le pasene o tagata malilili. Na ou maua nisi o faamaumauga e faapea, pe a ma le 30% tagata malilili e le i tuiina (unvaccinated); e a ma le 0.5% o latou ua mae'a ona tui (vaccinated). Jonathan Edwards na maliu i le tausaga 1758 i le smallpox. Le vaitau o le taua Revolutionary War, na faatonuina ai e George Washington ia faia tui o le smallpox o latou uma o fia tauto ma ulufale i le Continental Army e le i aafia i le ma'i. Pe a fua i le fuainumera o le smallpox e faamaui ai se vaegā'au, e tāua le fesili pe tatau ia i tatou ona finauina tui o le Koviti i le faigāmālō pe anafai e lē faatagaina e Washington le tui o le smallpox i ana fitafita?

Le 'au faitau ma latou o fia malamalama atili ina ia fai se faai'uga lelei ma talafeagai, ua ou faasoa atu nisi o mau mai le Tusi Paia e fesoasoani i lou faatuatua ma lau tōfā o tau saili. Ua ou avatu foi nisi o su'esu'ega, finauga, ma faai'uga faa-saienitisi a se vaega o foma'i atamamai ma nofoaga o faia ai pea saililiga faa-saienitisi o le ola mālōlōina. O le fesili a toe tuu atu mo oe—E tatau i tagata Kerisiano faatuatua ona talia leni tui mo le puipuiga o lona soifua mālōlōina? O la'u tali, ioe, e tatau ma talafeagai. O lo'u faatuatua i le ATUA na faia le tagata, na te faamālōlō i o'u ma'i ma faafouina lo'u malos, na āfua ai ona faia o'u tui o le Koviti-19. E lē se talitonuga o la'u ekalesia poo lo'u faalogo ma usita'i i a'oa'oga a se isi tagata, a o lo'u talitonu ma faatuatua i le ATUA ma lona finagalo ia soifua mālōlō-

ina tagata uma. I lona aotelega, o la'u ekalesia e talitonu i le mea moni ma faatuatua i le ATUA e ala i le musumusuga a le Agaga ma le Tusi Paia.

E ui ina tatou malamalama ma taofi eseese i le vairusi ma lona puipuiuga e ala i tui ua faateleina talu mai le tuana'i, e oo lava foi i le tamāoaiga o finauga ma su'esu'ega faasaienisi o le soifua mālōlōina, e lē mafai ona taofia ai le tele o sao eseese na mafua ai le saogalemu o tui ua mae'a ona faia. O nisi o auga ma tīgā o le tui e foliga mai e leai. O le faitau i tua ma faamaumauga faa-saienitisi ma foma'i talu mai le tausaga e 1880 e ma'eu ma matagofie. O le umi o le soifua i le Lunaite Sitete o lalo mai o le 50 tausaga le matua. I le tausaga 2020, ua sopo atu i luga i le 78.8 tausaga a o le i tupu le Koviti-19; na toe pa'ū ai i lalo i le 77.3 tausaga. O luma atu o le 1890 ma le salalau ai o le taliaina o le germ theory, na taumate pe a ma le 200 i le 300 pepe mai le afe e maliliu. O le 1990 na faaititia ai lea fuainumera pe a ma le 165 maliu i le 1000 e fananau mai. E oo mai i le 1997 e to'afitu maliu i le 1000 e fananau mai, na mafua mai i le taofiga o tui o faama'i e pei o le diphtheria,<sup>2</sup> pertussis (tale pa'ō, whooping cough), ma le measles (misela). Pe a ma le 50% o tatou e lē faitau i lenei tusiga auā e tatou te lē ola mai, se i vagana ai le alualu o le saienisi faa-soifua mālōlōina o aso nei. A silasila lelei i nei mau ma faamaumauga ua folasia i malae, ua faaalua ai le ATUA na ia foafoaina le lalolagi ia nofoia e tagata latou te tusia ma pulea, faaititia e le alofa tunoa o le ATUA nisi o aafiaga ma tīgā na mafua i le agasala a o tatou ulua'i matua—Atamu ma Eva.

### O. O Motugāmanatu Faai'u:

O se tulaga tataua ea ona avea ma a tatou faafetai o tagata Kerisiano faatuatua e faaalua ai le ATUA na matuaofaiva ma foafoaina le lalolagi e oo lava ia i latou e latou te lē iloina le poloa'iga a le ATUA o le foafoaga po o i latou o tetee ma lē talitonu i le ATUA Soifua. O le manava ola a le ATUA na tagata ola ai Atamu, ma lona fofoga fetalai na ia foafoaina ai le ola o mea uma i le lagi ma le lalolagi. O lana mānavāga paia foi lena na atamamai ma gaoioi ai tusitala o le Tusi Paia na faagaetia e le Agaga e tusi ma faamaumau tala o le faaaliga a le ATUA i le tagata (2 Timoteo 3:16-17). Na ou toe fesili atu foi lea, afai e te faatuatua o fea e te usita'i i ai, o le talitonuga faalelotu po o le ATUA ua talanoa ma faaali mai e ala i lana faaaliga o i le Tusi Paia? Le au faitau e, e lē o le mapo lotu poo faamatalaga a tagata e fua i ai lau faai'uga atamai. O lau tatalo ma sailiili i le ATUA e maua ai mālō; le faai'uga sa'o ma amiotonu. Silasila foi, o aso nei i le faiga a le isi 'aukeni ua saili le moa ma le fasi mamoe i le tootoo, tusa lava pe lē iloa fai se lauga, a ia iloa faitau le mea e sau ai, ona saofai lea i tua o lona fale ma faatali se ipu mea 'ai, se vae mālū ma se teutusi. Ua fau ma soloi le 'au alii amio faapena ua ta'uvalea ai fua lotu. O soo se tagata soifua faatuatua, na faia i le faatusa mamalu o le ATUA, e auauna o se faigaluega a le ATUA, o se meafaigaluega foi e saili ai nisi o nii o lana foafoaga o momoli faali'ali'a mai ai le agaga o le soifua mālōlōina ma lana faamālōlōga, o lana mealofa mo oe

ma a'u ma tatou uma; moli ia na lililo ua aliali i mulivai. O le tui o le Koviti-19 o se tasi lea o ana mealofa. E le liua ai oe e pei o se isi mea faapei ona manatu ai nisi, ae liua ai lou tino augavale na 'apogofie e le ma'i ma tīgā e avea ma tino soifua mālōlōina.

Ou te momoli atu mālū i pu'ega pe afai ua sala se gaganā o lenei 'aulape fautua. O le faatagiuā a le auauna ia alofagia le fanoga ma le taufonō a le faigāmālō – ia malupui-puia ma saogalemu le atunuu mai lenei faama'i tīgā ma mata'utia. E nofō lava le taliuta ae mata'i le ataata o galu fafāti ma galu pu'e. Pe afai e fati ma pupu'e, ona tatou tō faō lea o se faatalaūlaga i 'aao o le Tauola—le ATUA. O le tatalo, ia tali malie le tapua'iga a fuesinasina o le atunuu—ta'ita'i o ekalesia, le mālō ma le atunuu faapea aiga ma nuu. Ia alofagia pea tatou e le ATUA ia faaifo ni manū ma puipui le atunuu ma ona tagata. Le ATUA alofa puipui saogalemu Samoa atoa—Amerika Samoa ma Samoa Tuto'atasi.

Faafetai tele.



Moreli J. T. Niuatoa

\*\*\*\*\*

\$\$\$\$\$\$\$\$\$\$\$\$\$\$\$\$

\*\*\* LUCKY NUMBER \*\*\*

**KOMITI ATINAE EFKAS**

**\$150 i le pepa, \$2.00 i le poloka  
e 10 faailoga e ta'i \$10,000.00**

E maua pepa o le lucky number a le EFKAS i le Ofisa Tutotonu a le Ekalesia i Kanana Fou! Ia faafesootai mai le Ofisa Tutotonu poo le Komiti Atina'e i le 699-9810 mo ni ou pepa. Mo outou i atunuu i fafo, a mana'omia nisi pepa faapoopo, faafesootai mai le tuatusi imeli: [cccas@efkasonline.org](mailto:cccas@efkasonline.org) e lafo atu ai.

E faia le se'i o le Lucky Number ia lulai 16, 2022, o le a faasalalau atu foi i luga o le upega tafailagi.

\$\$\$\$\$\$\$\$\$\$\$\$\$\$\$\$



## Lisi o le 'Aufaigaluega Agavaa mo le Galuega Tausi 'Aulotu

O le lisi leni o le 'aufaigaluega i Faifeau ma A'oa'o Kanana Fou o loo avanoa ma agavaa mo le galuega tausii 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau sailia ni o latou feagaiga. O suafa ia, e le gata o le 'aufaigaluega o loo galulue nei mo le Ekalesia Aoa o Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoa o le imeli: [gensec@efkasonline.org](mailto:gensec@efkasonline.org), e fa'alauliloa ai lou suafa i le taimi e toe lolomia ai le Lamepa.

### Seminare Faafaifeau i Kanana Fou:

\*Dr. Moreli Niuatoa FF, *Peresetene*  
 \*Dr. Simi Mauga FF, *Sui Peresetene*  
 \*Dr. Fepuari Logoleo FF  
 \*Sasa Satoa FS  
 (\* e fa'amaonia e le 'Au Toeaina)

### Ofisa o le Failautusi

Fuli Taveuveu AKF

### Ofisa o A'oa'oga Kerisiano:

Setefano P. Lefale FS, Fa'atonu  
 Soosoo Tuiolomotu FS  
 Sega Ifopo FS  
 Vili Polikapo FS

### Lamepa:

Edward Semaia FS, Faatonu  
 Vagana K. Saili AKF

### A'oga Maualuga i Kanana Fou:

Bennett Muasau AKF  
 Frank Ah Ken AKF

### Pulega Fale-Ta'u:

Ioane Ioane FS (Fitiuta)

### Pulega Itu'au

Tavita Mailoto FS (Ma'ama'a)  
 Meke Matautia AKF (Nuuuli)  
 Al Luavasa Tunupopo AKF (Fagasa)

### Pulega Sa'ole:

Setefano P. Lefale FS (Auasi)  
 Vili Polikapo FS (Amouli)  
 Edward Semaia FS (Aunuu)  
 Siavao Iese FS (Alofau)

### Pulega Tualatai:

Sega Ifopo FS (Vailoatai)  
 Uaea Satele FS (Vailoatai)  
 Daru Ulutu FS (Malaeloa)  
 Sinaka Ulutu FS (Malaeloa)

### Pulega Alataua:

Rossetti Faamausili FS (Nua Seetaga)  
 Tasele Tuigamala FS (Leone)  
 Soosoo Tuiolomotu FS (Poloa)  
 Fetuao Mua FS (Leone)  
 Bennett Muasau AKF (Amanave)

### Pulega Tualauta:

Kirifi Muao FS (Pavaiai)  
 Taafua Taafua FS (Iiili)  
 Vagana K. Saili AKF (Aasu)

### Pulega Sua:

Ioane Peleti FS (Fagaitua)  
 Simeona Ape AKF (Laulii)

### Pulega San Francisco:

Moegagogo Tamasese FS  
 Eliu Eseroma FS (Daly City)  
 Ketesemane V. Tagalao FS (Sacramento)  
 Safue Ulufalelupe AKF (Sacramento)

### Pulega Santa Clara:

Vai Malaulu FS (Tafatolu)

### Pulega LA Saute:

Samuelu Tialavea FS (FOLA)

### Pulega USO:

Ieremia Tyrell AKF (Tacoma)

### Pulega Alaska i Matu:

Vaimoso Pasia FS (Lupe Faolataga)  
 Faalefu Savusa FS (Faavae Fou)

### Pulega Alaska i Saute:

Troy Foilefutu AKF (Feagaiga Fou)  
 Tomasi Foilefutu AKF (Feagaiga Fou)

### Pulega Ausetalia:

Oto Tumanu FS (Alofisa o le Atua)

## Lisi o 'Aulotu Avanoa

O nisi ia o 'aulotu o le EFKAS ua avanoa i le taimi na lolomi ai leni Lamepa,  
 o le a ogā ai leni lisi e saili ai so latou faifeau:

- EFKAS Fagasa
- EFKAS FSCLA
- EFKAS Ft. Hood, Killeen
- EFKAS Maamaa
- EFKAS Kanana Fou, Sydney
- EFKAS Ala i le Ola, Seattle